




**UCAPAN PENANGGUHAN
YB MENTERI PERTAHANAN KEDUA
MESYUARAT PERTAMA DARI MUSIM
PERMESYUARATAN KE-18
MAJLIS MESYUARAT NEGARA**

30 REJAB 1443

03 MAC 2022

JAM : 11.00 PAGI

Terima kasih Yang Berhormat Pehin Yang DiPertua



UCAPAN PENANGGUHAN

Yang Berhormat Pehin Yang Di-Pertua dan Ahli-Ahli Yang Berhormat yang dirahmati Allah SWT dan yang peramba/kaola/saya hormati,

1. Alhamdulillah, kita merafakkan ucapan syukur setinggi-tingginya kehadiran Allah Subhanahu wa Ta'ala, kerana dengan izinNya jua kita telah bersama-sama bermesyuarat, di Mesyuarat Pertama bagi Musim Permesyuaratan ke-18, Majlis Mesyuarat Negara yang telah bersidang di dewan yang mulia ini, dalam suasana baru secara hibrid bagi meneruskan pemikiran, perbahasan dan perbincangan isu-isu kemajuan

pembangunan negara serta isu-isu semasa, termasuk yang berkaitan dengan *COVID-19* serta impaknya.

2. Terlebih dahulu kaola dengan penuh hormat sukacita merakamkan ucapan setinggi-tinggi tahniah kepada Yang Berhormat Pehin Yang Di-Pertua, kerana telah sekali lagi dapat memimpin dan memandu Persidangan Majlis Mesyuarat Negara di dewan mulia ini dengan penuh kebijaksanaan, ketabahan, dedikasi dan dapat menjadikannya berjalan dengan lancar dalam suasana penuh muhibah dan bersemangat meskipun format permesyuaratan kita sedikit berubah pada tahun ini mengambil kira usaha untuk mengadaptasi dengan sebaik mungkin kepada keadaan dan cabaran semasa.

3. Ucapan penghargaan dan terima kasih juga ditujukan kepada Yang Dimuliakan Jurutulis Majlis Mesyuarat Negara, Yang Mulia Timbalan Jurutulis Majlis Mesyuarat Negara dan pegawai-pegawai serta kakitangan Jabatan Majlis-Majlis Mesyuarat diatas penyelenggaraan perjalanan mesyuarat yang teratur dan kemas.

Yang Berhormat Pehin Yang Di-Pertua,

4. Sepertimana yang telah kita sama-sama dengarkan dan bahaskan sepanjang sesi permesyuaratan kali ini, penularan *COVID-19* terus menjadi tumpuan kita yang mana kemunculan virus ini telah mendatangkan cabaran dari pelbagai haluan dan memberikan impak dalam pelbagai aspek. Ini bukan sahaja dari segi ekonomi, kesihatan dan masyarakat bahkan juga kepada keamanan dan pertahanan negara. Ianya juga mengandungi berbagai hikmah untuk kita terus hayati dan amati.

5. Ini antara lain menggariskan dan mengukuhkan kepentingan untuk terus mengekalkan tahap kesediaan dan kesiapsiagaan yang tinggi, terutamanya dalam konteks iklim negara dan dunia yang semakin penuh dengan ketidakpastian (*uncertainty*) begitu juga dengan landskap keselamatannya. Meskipun pada permukaannya penglibatan Angkatan Bersenjata Diraja Brunei sewaktu krisis wabak *COVID-19* ini lebih menyerlahkan kesediaannya kepada operasi-operasi

bukan tradisional, namun kesediaan untuk melaksanakan operasi-operasi tradisional dalam mempertahankan kedaulatan negara dan keutuhan wilayah pada masa yang sama tidak diketepikan dan akan tetap dikekalkan sebagai suatu keutamaan. Pada amnya, dalam zaman dan persekitaran kontemporari ini, pencerobohan wilayah dan kedaulatan masih berlaku di merata dunia, sepertimana yang dapat kita ambil iktibar daripada krisis pergolakan di benua Eropah sedang kita bersidang ini.

6. Dalam pada itu, sejajar dengan visi terbarunya untuk mewujudkan ***‘Sebuah Angkatan Bersenjata yang Dihormati dan Rakan Kerja yang Mantap’*** ke arah memastikan kedaulatan raja, negara dan ugama kekal terpelihara dan selamat, Kementerian Pertahanan dan Angkatan Bersenjata Diraja Brunei akan terus mengorak langkah untuk membangunkan sebuah angkatan tentera yang berkembang maju dan unggul dalam pertahanan yang merangkumi aspek kesediaan, kesiapsiagaan dan kekuatan kerohanian. Ini didukung berulang kali kaola nyatakan dan kongsikan dengan tiga (03) tonggak utama Pertahanan iaitu **keupayaan cegah**

rintang dan respons (*deterrence and response*), diplomasi pertahanan dan pertahanan holistik.

7. Selaras dengan titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam sempena Majlis Pembukaan permesyuaratan ini pada minggu lalu iaitu kepentingan untuk **meluruskan tadbir urus masing-masing mengikut keutamaan, keperluan, tidak membazir dan dilaksanakan dengan teratur.** Syukur Alhamdulillah Kementerian Pertahanan dan Angkatan Bersenjata Diraja Brunei telah pun mengambil inisiatif untuk mengemaskan kerangka komprehensif perancangan pertahanan yang diadaptasikan sebaik-baiknya menurut keadaan persekitaran strategik semasa yang cepat berubah-ubah dan akan menjunjung tinggi kurnia titah Baginda itu pada setiap masa.

8. Seperti yang kaola huraikan semasa ucapan Mukadimah pada hari Ahad yang lalu, **Kertas Putih Pertahanan 2021** yang

dilancarkan bersempena dengan Sambutan Jubli Intan Angkatan Bersenjata Diraja Brunei pada tahun lalu dan juga perancangan keupayaan pertahanan **Force 2035** dan **Force Structure Review**, yang sedang giat dijalankan, inshaa Allah dengan berkat daulat dan kepimpinan bijaksana Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam serta keprihatinan mendalam Baginda akan membolehkan Kementerian Pertahanan dan Angkatan Bersenjata Diraja Brunei, dengan tampuk pimpinan baharu, dan barisan kepimpinan di peringkat perkhidmatan (*services*) untuk terus bergerak dan berkembang dengan lebih terarah dalam menghadapi pelbagai bentuk cabaran masa kini dan yang mendatang.

9. Adalah suatu hakikat, pembangunan dan kemajuan sesebuah negara dan tidak terkecuali negara kita yang dicintai memerlukan keamanan dan persekitaran yang stabil. Sebagai sebuah entiti pertahanan, Kementerian Pertahanan akan terus memainkan peranannya dalam memastikan keselamatan negara tidak terganggu dan akan terus mengekalkan persekitaran yang selamat dengan kerjasama

agensi-agensi Kerajaan, bukan Kerajaan dan pihak berkepentingan yang lain melalui pendekatan '**Whole-of-Nation** dan **Whole of Government**' bagi sama-sama mendukung agenda pembangunan negara serta pencapaian Wawasan Brunei 2035.

10. Menyedari akan kepentingan kestabilan dan keamanan sebagai prasyarat utama untuk pembangunan negara dan pencapaian Wawasan Brunei 2035, agenda pertahanan dan keselamatan negara hendaklah sentiasa diberikan keutamaan dan tidak boleh dikompromi. Oleh itu, kepentingan pertahanan holistik hendaklah terus ditekankan dimana semua pihak termasuk kitani semua di dalam Dewan yang muli ini mempunyai peranan untuk menjaga kestabilan dan melindungi keamanan negara.

11. Di kesempatan ini, sekali lagi kaola merakamkan setinggi-tinggi penghargaan kepada Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam di atas penyediaan peruntukan pertahanan yang kekal substantif di mana ini, inshaa Allah akan digunakan

secara berhemah mengikut keperluan dan keutamaan ke arah pencapaian **key result areas (IKWONDAMAI)** bagi kemajuan pertahanan dan pada menepati dan menghormati serta memperjuangkan Tema Belanjawan 2022/2023 iaitu **“Memperkasa Kesejahteraan Awam ke Arah Sosio-ekonomi Yang Lebih Resilien”**.

Yang Berhormat Pehin Yang DiPertua, Ahli-ahli Yang Berhormat yang peramba/kaola hormati.

12. Bagi mengakhiri ucapan penangguhan, peramba/kaola/ saya berdoa kehadiran Allah Subhanahu wa Ta’ala semoga Yang Berhormat Pehin Yang Di-Pertua dan kitani Ahli-Ahli Yang Berhormat akan sentiasa dalam pemeliharaan dan perlindungan Allah Subhanahu wa Ta’ala serta dikurniakanNya taufik dan hidayah, sentiasa dalam keadaan sihat sejahtera dan kebahagiaan.

13. Peranan institusi pertahanan dan keselamatan serta sokongan seluruh rakyat dan penduduk dalam memperkukuhkan pertahanan negara adalah amanat berat,

inshaa Allah dengan adanya semangat, sentiasa sepakat, doa dan tawakal serta usaha, dengan memperkasa pendekatan “bersepadu” dan “bersatu” berpegang teguh kepada pepatah **“Bersatu Kita Teguh Bercerai Kita Roboh”** dengannya pertahanan negara, inshaa Allah akan terus kukuh dan ampuh.

14. Kita yakini Allah Subhanahu wa Ta’ala yang Maha Mengetahui dan Maha Berkuasa akan senantiasa memberkati dan merahmati negara kita dalam pertahanan, perkembangan dan kemajuannya untuk kebaikan bersama khususnya dalam mencapai wawasan negara dan juga kebahagiaan dan kerahmatan di dunia dan juga di akhirat. Kita berdoa disisiNya Negara Brunei Darussalam sebuah Negara Zikir adalah “Baladatun Tayyibatun Warabbun Ghafur”. Aamiin Ya Rabbal Alamin.

Sekian, Yang Berhormat Pehin Yang DiPertua.

Kaola sudahi dengan

وبالله التوفيق والهداية السّلام عليكم ورحمة الله وبركاته

Terima Kasih Yang Berhormat Pehin Yang DiPertua